

Segun Arkitecto Orlando Hoevertsz

Renobacion di edificio monumental ta un reto hopi grandi

ORANJESTAD – Arkitecto Orlando Hoevertsz a realisa e trabou masha exigente di renobacion di edificio monumental di Corte di Husticia y tambe e tabata involvi den e trabou di renobacion di oficina di Gobernacion, otro edificio monumental cu a haya un expansion cu un edificio moderno conoci como “Cocolishi”.

Como profesional riba tereno di arkitektura e no por sconde su satisfaccion ora cu un edificio cu el a renoba a forma parti di e 11 monumentonan di Paseo Monumental cu a tuma luga diadomingo ultimo. “Nos ta hopi orguyoso di esey cu nos por a diseña y expande edificio di Corte”, el a bisa.

Monumental y moderno

Un punto cu el a resalta di edificio di Corte di Husticia ta e parti monumental y e parti moderno tras di edificio aki, y nan a keda hopi satisfecho cu e resultado. Sr. Hoevertsz ta haya cu un trabou asina ta “un reto hopi grandes”.

Actualmente esaki ta e monumento mas grandi cu tin na Aruba cu wordo restaura. E ta resalta cu e parti pa expande e edificio aki tabata totalmente un reto. Te hasta nan a confronta varios sorpresa durante e construccion ya cu e diseño mes tabata basta complica.

Investigacion

Ademas nos mester considera cu no solamente ta e aspecto tecnico di construccion sino cu mester ta bon documenta pa e parti historico di un edificio monumental. Arkitecto Hoevertsz a bisa cu nan a haya hopi bon ayudo di Monumenten Bureau cu a haci cierto investigacion pa e edificio di Corte muestra den su estado original, te hasta nan a bay busca e color original. Ademas e poco mapa cu tabatin nan mester a studia nan bon. Nan a haya nan mes ta bay den e blafon pa mira e



estructura di e dak prome cu nan a traha e diseño pa asina analisa con e dak original tabata ta. Eynan a ripara pa ehemplo cu e dos extension cu tabatin na banda e angulo di e dak no tabata corecto manera mester ta. Tur esaki a nifica un cambio caminda e contratista mester a kita tur e panchinan, kita e estructura di e dak y haci esey den e angulo corecto.

Tur e cambionan aki a wordo haci danki cu nan a haci e investigacion durante e proceso di e diseño, el a bisa. Tambe un factor tin di haber cu e uzo di material nobo y moderno den e edificio historico aki. □